

JEMISI

JEMISIni Pepá Topa Sirimu Bokumu

I Pepá Topa Sirimumunge Ungu Pulu Mare

I pepá torumu ye Jemisi kanumu ‘Yesusi lom-bili andorumu Jemisi molo.’ konopu lemele. Kanu yemo ou toko kondoringi kolorumu (Lipe Mundorumu Yema 12:2 kanani). ‘Yesusi angenu Jemisini i pepámo torumunje.’ ningu pilimele. ‘Yu molorumu mele piliembo.’ ningulie Mateyu 13:55, Jono 7:2-5 kanoko, Ou-Korini 15:7, Gallesia 2:9, 1:19, Lipe Mundorumu Yema 21:18, 12:17, 15:13, Jutu 1:1 kanani. ‘Ponie sikiti tu yu toko kondoringi.’ ningu pilimele. Pilipe konginjeli yembo mare awisilini Lipe Mundorumu Yema 8:1 kinie 11:19 kinie kanoko, Jemisi 1:1 kanokolie, ‘Ye Sitipene toko kondoringi kinie Kirasinge yembo moloringi Juda yembo awisili bulu-balu ningu kowa puku kolea lupe lupe awisilinge anjo anjo puku moloringi kanu yemboma ipepámo topa sirimunje.’ ningu pilimele.

Pepá torumumunge ungu pulu mare: Te: Jemisini ipepá torumu akumu ‘Pulu Yemonga yemboma molko kondangi.’ nimbe mane sim-bendo pepá topa ungu peanga awisili nirimu. ‘Pepána tokoro ungumu yemboma paa piliengi! Ulu peangama mindi konopu siku teko molangi.’ nimbe ungu mare awisili iko topa nirimu (1:23-25, 3:3-12, 4:14, 5:7). ‘Umbunema wendo ombá, mindili nonge kinie tondolo munduku molko

munduku siye naa kolangi.’ nirimula (1:2-12, akumunge 1:12 paa kanou, 5:7-11,13-18). Ungu te: ‘Yembo te ‘Yesusi Kirasi sike.’ nimbe tondolo mundupe pilimo yembomo we naa molopili.’ nimbe Jemisini tondolo mundupe nirimu. ‘Kanu yembomone yembo mare lipe tapondopa ulu peangama tepili. Aku sipe temba kinie yembomane kanokolie ‘Yu sike Kirasi tondolo mundupe pilimo lemo.’ ningu pilinge.’ nirimu. Bokumunge alsena anjokondo “8. bilip”, “45. stretpela man” kananila. Ungu te: Yembo kamakomando liepi-liepi topa nirimu ungu mare 1:10-11, 2:1-7, 5:1-6 kinie molemo. Ungu te: Yesusini mane sirimu ungu mare kinie, Jemisini ipepána torumu ungu mare kinie, telu sipe mele molemo i siku mele kanani: Jemisi 2:5 mele Mateyu 5:3 molopa, Jemisi 3:10-12 mele Mateyu 7:15-20 molopa, Jemisi 3:18 mele Mateyu 5:9 molopa, Jemisi 5:2-3 mele Mateyu 6:19-20 molopa, Jemisi 5:12 mele Mateyu 5:33-37 molemo.

Ya ungu pulumu pora nikimu.

**1:1-18 OLIO TOPA MANIE MUNDUMBE
TEMBA UMBUNEMA OLIO MOLOMOLONA
WENDO OMBÉKINIE TONDOLO MUNDUPU
MOLOMOLO KINIE PULU YEMO KINIE MOLOPO
KONDOMOLO UNGU TE**

*1:1 Jemisini Pep mo Tombando Pulu Polopa
Torumu Ungumu*

1 Na Jemisi, Pulu Yemo kinie Awili Yesusi Kirasiselonga* kongono tendeli kendemande ye te,

nane ipepámo topo,

ᵐIsirele yembo, talape rureponga yembo† bulu-balu ningu kowa puku ᵐkolea Judia disiriki ulsukundu, kolea lupe lupemanga molemele yemboma topo sikiru.

Eno manda molemeleye?

1:2-4 Umbune Wendo Olemomane Olio Enge Silimo Ungu Te

2-3 Nanga angokeme, ‘ ‘Eno ‘Sike.’ ningu tondolo munduku pilimele ulumu‡ kapola pembane manie pumbene.’ nimbe manda manjilimo umbunemane enonga konopume tepa tondolo mundundulimo.’ ningu pilimele kene eno topa manie mundumbe temba umbune lupe lupema eno molemelena wendo ombá kinie ‘Papu wendo okomo.’ ningu konopu siengi. ⁴ Eno molko kondoko, kamu umbu konopu pepili Pulu Yemonga yembo yume molko,§ Pulu Yemone kanopa peanga kanolemo ulu peanga te enonga konopune molo naa topili molangi kene alieli tondolo munduku umbunema meangi; konopu tondolo mundundoli ulume eno-kinie tondolo mundupe pepili.

* **1:1:** bokumunge alsena anjokondo “13. God”, “6. Bikpela”, “23. Krais”. † **1:1:** LLuku 22:30*. ‡ **1:2-3:** bokumunge alsena anjokondo “8. bilip”. § **1:4:** Epesasi 4:13, Kollosi 4:12.

1:5-8 Yembo Tenga Pilipe Konginjelimu Kapola Naa Pemu Liemo Yu Pulu Yemo Mawa Tepili Ungu Te

⁵ Yembo te pilipe konginjeli naa pemu liemo Pulu Yemo kinie ungu nimbe mawa tepalie “Pilipe konginjeli te si.” nimbé kinie melema mawa telemele kinie iri naa topa mele aw-isili toya topa silimo Pulu Yemone sike simbe. ⁶ Nalo kanu yembomo ‘Mawa tembo mele sike simbe.’ nimbe tondolo mundupe pilipelie mawa tepili. Konopu talo tepa kimbu silimo yembomo, poporomene unjo mumu memba andolemo mele,* yunge konopumu aku telemo kene ‘Simbene naa simbene. Lipe tapondombane naa tapondombane.’ nimbe konopu talo tepa naa kimbu sipelie ‘melema mawa tepili.’ ⁷⁻⁸ Yembo te aku sipe konopu talo tepa pelemo yembomo yu konopu talo tepa pelemomonga yunge konopumu bulu-balu nimbe, mele telu mindi konopumu pilipe ulu te temba aulke te naa lemo kene ‘Awilimuni na melte simbe.’ nimbe naa piliepile.

1:9-11 Ye Koropama Kinie Ye Kamakoma Kinie Enonga Ungu Te

⁹ Eno ‘Kirasinge yembomanga,’ angenu te koropa pupili molopa imbi naa molemo yembomo ‘Pulu Yemone,’ yu-kinie ulu peanga te tepa,

* **1:6:** ‘Umbu yembomane Giriki unguné nilimo mele sumbi siku naa pilingenje. Ungu pulumu sumbi siku piliengi!’ nimbulie unjo mumu telemo mele ya torumulu. Giriki unguné molemo mele isipu tolemela molka: “poporomene nomu kusa topa memba andolemo kinie yu lope-lape tepa andolemo mele”, aku sipu tolemelamo.

‘Imbi ola molopili.’ nimbé kene konopu sipili.
¹⁰ Nalo pillawa sindi te enge naa nimbe non-
 dopa tanda lemo mele yemboma aku siku kamu
 naa molko nondoko kolemele kene pilipelie
 ‚Kirasinge, yembo kamakomo ‚Pulu Yemone,‘
 ‘Yu imbi naa molopa we yembo mele molopili.’
 nimbé kinie konopu sipili.† ¹¹ Ena paa kon-
 dolemo kinie era melema topa kondolemo kinie
 pillawa sindi peanga tolemoma kolopa ole lepa
 manie pulimo.‡ Aku sipela yembo te mele awisili
 nosilimo yembomo kou limbe kongonomo tepa
 molopalie kolomba kanumu.§

*1:12-18 Pulu Yemone Olio-Kinie Ulu Peangama
 Mindi Tapa, ‘Ulu Kerime Teangi.’ Nimbe Kondi
 Naa Tolemo Ungu Te*

¹² Yembo te umbune lupe lupema wendo
 olemo kinie aku umbunema memba tondolo
 mundupe molemo yembo akumu umbune
 wendo olemomane yu topa manie naa
 mundulimomonga Pulu Yemone alieli konde
 molopa kondopa mindi puli ulu pulumu*
 simbe, akumu yunge mele kalolimu limbe kene
 umbune lupe lupema wendo ombá kinie ‘Aku
 umbunema papu na-kinie wendo okomo.’ nimbe
 konopu sipili. Kanu mele kalolimu koronga
 ou Pulu Yemone “Yu paa konopu mondonge
 yemboma aku sipu mele kalombo.” nimbe,
 nimbe panjerimu mele kalolimu.

† **1:10:** LLuku 14:11. ‡ **1:11:** Aisaya 4:6-7, Ou-Pita 1:24.
 § **1:11:** LLuku 12:13-21. * **1:12:** bokumunge alsena
 anjokondo “24. laip”.

13 Ulu tene yembo te ‘Ulu pulu keru te tei.’ nimbe ulu te manda manjimbe kinie kanu yembomone ‘Pulu Yemone na ‘tepo kenjembo.’ nimbe kondi tokomo.’ ni naa nipili. Ulu pulu kerimuni Pulu Yemondo ‘Ulu pulu keru te tei.’ manda naa nimbé. Nimbé mele Pulu Yemone pilimbe aulke te paa naa pelemo.† Pulu Yemone yembo tendo ‘Ulu pulu keru te tei.’ paa manda naa nimbéla kene ,aku siku naa niengi,. 14 Yemboma enonga konopumene aku ulu pulu kerime ‘teangi.’ nimbe kondi tolemo kinie enonga konopu keru akumene ‘Ulu pulu kerime teangi.’ nimbe kondi topa eno kundulimo. 15 Kanu kinie ambo te ambolango mondopalie melemó mele konopumuni waka kolopalie ulu pulu keru te melemó. Kanu kinie ulu pulu kerimu akopa pora sipelie kololi ulu pulumu melemó.‡

1:16-18 Ungu Nimbe Ulu Telemoma Paa Alowa-Malowa Naa Telemo Yemonga Ungu TeS

16 Nanga paa konopu mondolio angokeme, enonga konopuni ‘Sike nikiru.’ ningu kolo toko enonga konopume liku kekelepo naa tondayo. 17 Mele peangama kinie ulu peangama kinie, aku sipe ulu paa peangama pali yando we naa limolo. Kanu melema mulu koleana wendo olemo. Mulune pa tendeli angilimoma tepa panjerimu Lapamone kanu mele paa peangama silimo. Mulune angilimo pa tendelime omba

† 1:13: Setenene Yesusi kondi torumu temanemo Mateyu 4:1-11.

‡ 1:15: Romo 6:23, 7:13. § 1:15: Yesusi paa alowa naa telemo ungu te Ipuru 13:8.

pulimo kinie kolea tangopa sumbulu topa, unjo kinie melemanga minime angilimo mele alowa-malowa teko pulimele mele kanu Pulu Yemo aku sipe alowa-malowa naa tepa, olio sumbulu tondomba mele te yu-kinie paa naa pepa, konopu telumu mindi pepili molemo. ¹⁸ Kanu alowa-malowa naa telemo yemone, ‘Olio yunge ambolangoma molangi meambo.’ nimbelie* ‘Yunge temanemo, olio lipe tapondopa yemboma konde molonge tondolomo pelemo temane paa sike-mone olio mendepili.’ nirimu.† Yuni olio ‘melema terindumenga pali kumbi leko molangi.’ nimbe olio aku sipe merimu.

*1:19-5:6 PULU YEMO TONDOLO
MUNDUPU PILIPULIE ULU PEANGAMA TEPO
MOLOMOLOMONGA UNGU MARE*

*1:19-27 “Pulu Yemonga Ungumu Komuni Mindi
We Naa Piliengi! Pilkulie Pilku Liku Tenge Panjiku
Teangi.” Nirimu Ungu Te*

¹⁹⁻²⁰ Paa nanga angokeme, Yembo tene ungu te nimbé kinie ‘Mimi sipu piliemili.’ ningu komu tendeko molko, ungu te nondoko pundu toko naa ningu, sumbi siku mumindili naa kolangi. Kanu ungumu yembomane pali paa mimi siku pilku konopune panjengi! Pulu Yemone ‘yemboma sumbi siku molonge kinie papu.’ konopu lepa kanolemo mele yembomanga mumindili kololi ulu akumuni ‘Aku siku molangi.’ nimbe naa lipe tapondolemo kene nondoko mumindili

* **1:18:** bokumunge alsena anjokondo “31.3. pikinini bilong God”. † **1:18:** ungu pulu tondolo te Jono 3:3-8.

naa kolangi. ²¹ Akumunge ɿ‘Ga pupili.’ ningu era telemele mele, ulu kalaro mololime kinie ulu kerime kinie telemelema pali ‘Na-kinie naa molopili.’ ningu munduku siye kolko, ɿPulu Yemone, ungu ou enonga konopumenga panjinderimu, aku ungumuni eno mini pali lipe tapondopa mindili nolemela aulkena manda wendo lipe Pulu Yemo kinie pea molko kondonge aulkena manda lipe mondomba akumu taka liku pilku liku molangi.

²² ɿPulu Yemonga, ungumuni nilimo mele we komuni mindi naa piliengi! Pilkulie pilku liku tenge panjiku teangi. We komuni mindi pilkulie nilimo mele naa telemele liemo eno enono kolo toko ‘Papu tepo molemolo.’ konopu lemele. ²³⁻²⁴ ɿ‘Aku teangi.’ nikirumunge ungu pulu te i sipe mele, Yembo tene ungumu we komuni mindi pilipelie, nilimo mele pilipe lipe naa temu liemo yu yembo tene ulu te telemo mele yu aku sipe manda manjipe telemo. Yembo te yunge kumbi-keremo kariyápana kanopalie, pe yunge minimu kanopa pora sipelie ɿyu sumbi sipe molomba mele ulu te naa tepa, anjo pupe yu molemo mele tamburumbu komu sindipe naa pilimo, aku sipe mele yembo nikirumuni aku telemo. ²⁵ Nalo yembo tene, ulu pulu kerimene olio ambolopa ka kongono silimo aulkena ‘Mindili naa nongo we molangi.’ nimbe wendo lindilimo ungu mane peangamo kariyápa mele mimi sipe kanopa siye naa kolopa molopa, nilimo mele komu naa sindipe pilipe lipe tepa molomu liemo kanu yembomone ulu telemo-mane yu tepa kondombamonga yu molopa kon-

domba.†

²⁶ Yembo tene ‘Na Pulu Yemonga ungumu paa pilipu lipu yu popo topo kapi nimbu kondopo molio.’ nimbe pilipe molemo nalo yunge alumbelumu nokopa naa kondomu liemo yuni yuyu kolo topa konopuni mindi ‘Sike aku telio.’ nimbe pilipe, yunge konopumu lipe kekelepa tondolemo. Yu ‘Pulu Yemonga ungumu pilipu lipu, yu popo topo kapi nimbo ungu manema paa pilipu molio.’ nilimo ulu akumuni yu lipe tapondomba uluri naa telemo. ²⁷ Olione ‘Pulu Yemonga yemboma molopo yu popo topo kapi niemili.’ nimolo yembomane olionga Lapa Pulu Yemone ulu kake tepa kalaro naa molemo nimbe kanolemo ulume temolo mele isipe: Anupili lapali kolemele ambolango kolumulume kinie, ambo wayema kinie, mindili siku umbunema wendo opili molemelema ‘aku siku naa molangi.’ ningu nokoko, ‘Mana yembomane ulu pulu kerime telemele mele naa tenge. Kanu ulu pulu kerimene olio ulu te naa tepa, olio kalaro te naa mondopili.’ ningu molko kondolemele. ₁Aku telemele yemboma olionga Lapa Pulu Yemone ‘yembo sumbi nilime molemele.’ nimbe kanolemo. ₁

2

2:1-13 Olione Yemboma Apurou Naa Apurupu Pali Kondo Kolopo Lipu Tapondamili Ungu Te

¹ Nanga angokeme, eno olionga Ye Awili Yesusi Kirasi* ye paa peanga imbi ola molopa tondolo

† **1:25:** inie anjokondo 2:12-13.

* **2:1:** bokumunge alsena

anjokondo “13. God”,

pulimu ‘Sike.’ ningu tondolo munduku pilimele-
 mane† ,yemboma apuruku, yembo te ,imbi ola
 mololimu, liku tapondoko, yembo te ,imbi ola
 naa mololimu, naa liku tapondoko, naa teangi.
² Ye te mulumbale paa peangama panjipe kou-
 gollone teli ki-ongi te mondomba ye te kinie,
 ye koropa te mulumbale kerime panjimbe ye te
 kinie, aku yeselo eno maku toko molongena on-
 gele kinie kanokolie ³ ye mulumbale peangama
 panjimbe yemo ,kanoko peanga kanokolie, paa
 nokoko “I polo peangana ongo molou.” ningu,
 ye koropamo ,kanoko keru kanokolie, yundu
 “I nie ongo ola angiliei.” molo “Nanga kimbu
 munduliona ongo manie molou.” ningi liemo
⁴ aku tengemonga eno konopu keru pepili eno
 enono anjo yando apuruku naa kenjilimeleye?
 Eno aku siku yemboma apurulimele mele enono
 konopuni pilkulie “I yembomone na manda lipe
 tapondomba. Imuni na naa lipe tapondomba.’
 nimbu kanopo apurupu kenjilimolo lemo.’ ningu
 naa pilimeleye?

⁵ Paa nanga angokeme, pilieme! Pulu
 Yemone ‘Yembo mare nanga yemboma molangi.’
 nimbe mako tombando ya ma koleana yembo-
 mane yemboma kanoko ‘yembo koropa pupili
 molemele.’ ningu kanolemele yembo kanume
 Pulu Yemone mako topalie ‘Yembo kamako mele
 molangi.’ nimbe ,enondo nimbendo:, “Enone
 ‘Yu sike.’ ningu tondolo munduku pilku kon-
 dokolie ‘Yembo na konopu mondonge yemboma

† 2:1: bokumunge alsena anjokondo “8. bilip”.

nane ye nomi kingimu molopo nokolio koleana[†] na-kinie pea molamili.’ nimbu panjerindu akumu eno pea aku sipu molamili wangi.” koronga nilimo. ⁶ Nalo ınanga angokeme, enone yembo koropama ‘Pipili kolangi.’ ningu teko kenjilimele. ıAngokeme,ı yembo namelene eno kondi toko enonga melema liku, mindili siku, ‘Kote tendamili waa.’ ningu, telemele yembo akume nameleye? ıYe koropamane aku telemel-eye? Molo!ı Ye kamakomane eno-kinie aku telemele kanumu. ⁷ Eno Yesusi Kirasinge yemboma molemele kanu yemonga imbi peangamo namelene ungu taka tondolemeleye? ıYe koropamane aku telemel-eye? Molo!ı Ye kamakomane aku telemele kanumu.

⁸ Pulu Yemonga bokune ungu mane te sirimu paa olandopa molemo kanu ungu manemo pilku liku tenge panjiku tengi liemo paa papu. Kanu ungu manemone nimbendo:

“Enono yu-mele-mele konopu mondoko,
enonga kangime enono kondo kolko
nokolemele mele
aku sikula pulu lemo yemboma
konopu mondoko nokoko molangi.”

nimbe molemo ungu mane kanumu\$ pilku liku tengi liemo peanga. ⁹ Nalo yemboma kanoko apurukulie ‘Yu peanga. Lipu tapondambo. Yu kerı. Naa lipu tapondambo.’ ningi liemo ulu pulu kerı te telemele, akumunge ıPulu Yemonga,ı ungu manemane* ‘Nu ungu mane te pulue tonu lemo.’

[†] 2:5: bokumunge alsena anjokondo “20. kingdom”. § 2:8:

LLipai 19:18, Mateyu 5:43*.

* 2:9: bokumunge alsena

anjokondo “26. lo”.

nimbe lipe ora simbe. ¹⁰⁻¹¹ „Aku nikirumunge pulumu i sipe:„ Olio pilimolo, “Ambo ye puli te molo ye ambo lili te yembo te lupe kinie wa ulu kerinele naa teangili.” nimbe ungu mane sirimu yemone “Yembo te toko naa kondangi.” nimbe mane sirimula pilimolo. Aku liemo nu wa ulu kerinele naa tekolie yembo te toko kondonu liemo ungu manema pulue toli yembomo moleno. Akumunge yembo te ungu manema pali pilipe lipe telemo nalo telu mindi pulue tomu liemo aku telemomonga ungu manema pali pulue tolemo kanumu.†

¹²⁻¹³ „Ulu te tengendo molo ungu te ningendo ou i siku ningu piliengi:„ ‘Ulu pulu kerimene olio ambolopa ka kongono silimo aulkena ‘Mindili naa nongo we molangi.’ nimbe wendo lindilimo ungu mane peangamone nilimo mele pilipelie Pulu Yemone olio ulume tepo ungume nimbu telemolo mele pilipe apurumbe kene.’ pilkulie kanu ungu manemo pilku ulume teko ungume ningu teko molemele mele pilku teko kondangi.‡ Yembo tene yembo te kondo naa kolomu liemo pe Pulu Yemone kote pilipelie yu kepe kondo naa kolombala.§ Yembo tene yembo te kondo kolomba yembomo Pulu Yemone yunge kote pilipelie yu kepe kondo kolomba. Pulu Yemone aku sipe kote pilipe temba kene pilkulie ungume ningu ulume tenge mele pilku kondokolie teangi.

2:14-26 ‘Pulu Yemo Sike. Yuni ‘Tembo.’ Nilimo

† **2:10-11:** Gallesia 3:10, Mateyu 5:18-19, 23:23. ‡ **2:12-13:** inie yakondo 1:25. § **2:12-13:** Yesusini ou ungu iko te topa sirimu; Mateyu 18:21-35.

*Mele Sike Telemo.’ Ningu Tondolo Munduku
Pilimele Ulumu Kinie Ulu Peangama Telemele
Ulumu Kinie Kanuselonga Ungu Te*

¹⁴ Nanga angokeme, yembo tene nimbendo: “Na ‘₁Pulu Yemone lipe mundorumu ye nomi Yesusi Kirasi, sike.’ nimbu tondolo mundupu pilio.”* nilimo nalo ₁‘Sike.’ ningu tondolo munduku pilimele yembomane telemele mele, ulu peangama naa telemo liemo yuni tondolo mundupe pilimo ulumuni yu lipe tapon-dole-moye? Yuni tondolo mundupe pilimo ulumuni yu mindili nolka aulkena wendo lipe Pulu Yemo kinie molopa kondomba aulkena manda lipe mondbayeye? ₁Ulu peangama naa telemo liemo paa manda molo. ¹⁵ Angena te mulumbale keru te panjipe, langi nombá te naa lemba kinie, ¹⁶ enonga yembo tene yu langi kinie mulumbale mare naa sipelie yundu nimbendo: “Nu konopu pe nipili puku, ali naa tepili mulumbale peanga te pakoko, olo temba langi mare nani pu.” nimu liemo aku sipe nimbemone yu sike lipe tapon-dombayeye? ₁Uluri kapola naa temba. ¹⁷ ₁Yembo tene yembo te naa lipe tapon-dopa kerena “Kap-ola molani pu.” we nilimo kinie kanu yembomo naa lipe tapon-dopa uluri naa telemo, aku sipela. Yembo tene ₁‘Sike.’ nimbe, tondolo mundupe pilipelie ulu peangama naa temu liemo yunge tondolo mundupe pilimo ulumu mele kololimu mele; uluri manda naa temba.†

¹⁸ Nalo yembo tene ₁nane ya nikirumu ‘Kolo tokomo.’ nimbelle nando, nimbendo: “Yembo

* **2:14:** bokumunge alsena anjokondo “8. bilip”. † **2:17:** inie 2:26.

marene ‘Sike.’ ningu tondolo munduku pilimele
 1 ulu akumu mandala. Yembo marene ulu
 peangama teko yemboma liku tapondolemele
 1 ulu akumu mandala. 1 Ulu talo pea telu sipemo.
 Yembo tene kanu uluselonga ulu te mundupe
 siye kolopa te pilipelie temba kinie kanu ulu
 telumuni manda lipe tapondomba.” nilkenje.

1 Aku sipe nilke yembomondo nane topon-
 dopo isipu nilke: “Nu 1 Kirasini, sike 1 “nanga”
 nimbe tenderimu tendelema,” nimbu tondolo
 mundupu pilio mele lipu ora siembo.” ningu ulu
 peanga te naa tenu liemo nu sike ningu pilino
 mele na nambepo kanomboye? 1 Manda naa
 kanombo. Na ulu peangama tepo yemboma lipu
 tapondombo ulumene 1 ‘Sike.’ nimbu, tondolo
 mundupu pilio mele lipu ora simbo. 19 Nuni
 ‘Pulu Ye telu mindi molemo.’ ningu tondolo
 munduku pilino. Akumu papu teleno. 1 Nalo,
 kurumene kepe aku siku tondolo munduku pil-
 imele. Pilkulie pungu-pungu ningu mini-wale
 mundulimele.

20 Aroma toli yembomo, we ‘Sike.’ ningu ton-
 dolo munduku pilku ulu peangama naa teleno
 ulumuni uluri manda naa temba mele † ungu
 pulumu pilieni nimbu siemboye? 21 Olionga
 anda kolepa Eporayamone ulu te terimu mele
 kanopalie Pulu Yemone yunge ulu pulu ker-
 ime siye kolopa, ‘Yu konopu sumbi nimbe peli
 yemo.’ nimbe kanorumu. Eporayamone yunge
 malo Aisake Pulu Yemo popo topa kalopa sim-
 bendo polona ola noserimu kinie kanopalie §

† 2:20: inie 2:26. § 2:21: Ou Pulu Pulu 22:1-19.

Pulu Yemone ‘Yu ye sumbi nilimu.’ nimbe kanorumu.* 22 Mimi siku piliee! Eporayamone ‘Sike.’ nimbe tondolo mundupe pilierimu ulumu kinie ulu terimume kinie kapola kapola terimu kinie yuni terimu ulumene yunge ‘Sike.’ nimbe tondolo mundupe pilierimu ulumu kamu tepa tondolo mundundorumu kanumu. 23 Aku sipe terimumunge Pulu Yemonga bokune yundu ungu te nilimomonga pulumu wendo orumu. Kanu ungumu isipe:

‘Pulu Yemone yu-kinie “Tembo.”
nirimu mele Eporayamone ‘Sike temba.’
nimbe tondolo mundupe pilierimumunge
kanopalie

Pulu Yemone “Yu ye sumbi nilimu.”

nimbe kanorumu.’†

Eporayamone aku terimumunge Pulu Yemone yundu

‘ “Nanga pulu lemo yemo.” nirimula.’‡

aku sipe molemo kanumu. ¶ Yembo tene nando ungu te aku sipe nilkenje§ nane aku sipu topondopo nilke. 24 ¶ Eporayamo kinie Pulu Yemo kinie elone teringili mele, pilkulie, yembo tene we ‘Sike.’ nimbe tondolo mundupe pilimo kinie kanopalie ¶ Pulu Yemone, ‘Yunge ulu pulu kerime siye kolopo, ‘Yu konopu sumbi nimbe peli yembomo.’ nimbu kanolio.’ naa nilimo. Yembo te ¶ ‘Sike.’ nimbe tondolo mundupe pilipelie, ulu

* 2:21: Ipuru 11:17; bokumunge alsena anjokondo “45. stretpela man”. † 2:23: Ou Pulu Pulu 15:6, Romo 4:3, Galesia 3:6; bokumunge alsena anjokondo “45. stretpela man”. ‡ 2:23: Pe Kingime Talo Sipe 20:7. § 2:23: inie 2:18.

peangama telemo kinie kanopalie Pulu Yemone ‘Yunge ulu pulu kerime siye kolopo, ‘Yu konopu sumbi nimbe peli yembomo.’ nimbu kanolio.’ nilimo mele pilimele.

²⁵ Aku sipela, ɿJosuane ye talo Jeriko taonona lipe mundorumu kinie, ‘Yemboma nambe-elemenje.’ ningu kanoko panjingele puringili kinie ambo wapura Reyapone ‘Elo naa tangi.’ nimbe lipe tapondopa ‘Ya lopi teko peangili.’ nimbe nokopalie, pe ‘Aulke tenga lupe kelko yando wangili.’ nimbe lipe mundorumu kinie aku sipe terimumunge kanopalie ɿPulu Yemone, ‘Yu ambo sumbi nilimu.’ nimbe kanorumu.*

²⁶ Yembo tenga minimu kangimu mundupe siye kolopa pulimo kinie kangimu kolemo, aku sipe yembo tene ‘Sike.’ nimbe tondolo mundupe pilipelie ulu peangama naa telemo kinie yunge tondolo mundupe pilimo ulumu kolemola.†
ɿMinimu kangimunge sukundu pelemo kangimu kapola konde molemo mele aku sipe, ‘Sike.’ ningu tondolo munduku pilimele ulumu kinie yemboma liku tapondonge ulu peangama kinie liku tere leko tenge kinie manda temba. Te teko te naa tenge kinie manda naa temba.,

3

3:1-12 Olonga Alumbelume Nokopo Kondopo Ungu Peangama Minda Nimolomonga Ungu Te

¹ Nanga angokeme, ɿPulu Yemone yembomanga ulu telemelema apurupe pilimbe kinie,

* **2:25:** Josua 2:pali, 6:22-23, Mateyu 1:5, Ipuru 11:31. † **2:26:** inie 2:17,20.

olio yemboma 1yunge ungume, mane silimolo yemanga ulu telemoloma paa tondolo mundupe apurupe pilimbe kene enonga ye mare awisilini ‘1Pulu Yemonga ungume, yemboma mane siemili.’ naa niengi. 2 1Aku nikirumunge pulumu niembo:’ Wale awisili olio ‘ulu 1peanga, te temolo.’ konopu lepolie naa telemolo; ‘Ulu keru te naa temolo.’ konopu lepolie telemolo. Aku sipe ulume olio yemboma kinie pali wendo olemo. Yembo tene walsikele kepe ungu keru te naa nilimo liemo kanu yembomo yu yembo paa peangamo, yunge kangime pali manda nokopa kondomba.

3 Ungu nikirumunge pulumu isipe mele: Yembo tene ‘Kongu ote te nanga ungumu piliipili.’ nimbe yunge kerena aini te panjindilimo kanu kinie yuni ‘Otemo isipe pupili, isipe pupili.’ nimbe ainimu lipe sumbi sindilimo kinie otemo aku sipe topele topa pulimo.* 4 Sipi telemo mele piliengila! Sipime paa mele awilime nalo poporomene kolea lupe marenga topa mundumbe telemo kinie sipimenga sitiayama paa mele kangama nalo sipi kongono telemo yemane ‘Kolea tenga pumolo.’ konopu lekolie sitiayama ambolko pupu tolemele kinie ‘Pumolo.’ nilimele kolea akune pulimo. 5 Aku sipe mele olionga alumbelumu kangimunge mele kangamo nalo yu yuyu kapi nimbe yunge imbi lipe ola mundulimo. Tepe kanga tene kolea awisili kuli-tepe nolemo mele eno piliengi! 6 Alumbelumu

* **3:3:** Kongime mengo pungendo moko toko ka ambolko meli pulimele mele kongu otema aku telemo mondo nirimu.

tepe mélemola. Olionga kangimenga pali yu mele kelomo nalo yuni ulu pulu keru awisili tepalie kalume pali tepa kalaro mondopa, 1 akumuni ungu nilimolo ungumene, 2 kuli-tepene koleamanga pali nolemo mele yemboma tepo kenjilimolo. Aku tepemo yu 3 Pulu Yemone kurumenga nomi Setene lipe mundumbe, 4 tepe koleana† wendo omba kalemo tepemo.

⁷ Yembomane kongi kinie kera kinie wambiye kinie takera mele lupema kinie nomu kusana suku molemo melema kinie aku mele lupe lupe awisili liku ‘Aku melemane olionga nimolo ungume pilku teangi.’ ningu mane siku nokolemele, ⁸ nalo yembo tene yunge alumbelumu aku sipe manda mane sipe naa nokolemo. Yu ulu keru tembando taka lipe naa pelemo mélemo; yemboma kolemele tomoma mele olionga alumbelune si nimbe pelemo.

⁹ Alumbelumuni kerena Awilimu olionga Lapamo kapi nimbu imbi lipu ola mundundulimolo; Pulu Yemone yu molemo mele aku sipe terimu yemboma alumbelumuni kepe ‘Molko kenjengi!’ nimbu, nimbu kenjilimolo. ¹⁰ Kere telune 1 Pulu Yemo molo yembo te, kapi nimbe imbi lipe ola mundundulimo ungu peangama kinie nimbe kenjilimo ungu kerime kinie wendo olemo. Nanga angokeme, aku sipe ulumu ulu peanga te molo. ¹¹ Mana no telu pikipe wendo olemona no peanga te kinie no kombili teli

† 3:6: ‘Ungu iko topalie “Setene” yuyu nimbendo “tepe koleamo” nirimu.’ ningu pilimele. Tepe koleamondo Mako 9:47-48, Mateyu 5:22, LLuku 16:23; Setene molemo mele Jono 8:44; bokumunge alsena anjokondo “42. Seten”.

te kinie telune wendo naa olemo. ¹² Nanga angokeme, unjo piki te unjo ollipi mongo manda tombaye? Molo unjo waene te unjo piki mongo manda tombaye?† Aku sipe, no kombili teli tenga no peanga te manda wendo naa ombá.

3:13-18 Yembomanga Pilipe Konginjeli Peangamo Kinie Pilipe Konginjeli Kerimu-selonga Ungu Te

¹³ Enonga yembo te ungume mimi sipe pilipe, yembomanga ulume pilipe apurupe kondopa, pilipe konginjeli pelemoye? Aku sipe telemo yembo te molomu liemo ‘Yembomane yu sike aku sipe yembomo molemo mele ningu kanangi.’ nimbe yunge aulke andopa ulu tembama paa peanga liepili. Yu kara pupe yunge imbi lipe ola naa mundupe, konopuni pilipe kondopa, pilipe konginjeli pelemo ulu peangama mindi tepili. Aku temba kinie yembomane kanokolie ‘yu sike pilipe konginjeli peli yembomo molemo.’ ningu kanonge. ¹⁴ Nalo yembo mare imbi ola molemo molo teko kondolemele molo ulu telemele mele kanokolie ‘Aku siku naa molangi. Aku siku naa teangi. Olio aku sipu molemelanje papu.’ ningu eno-kinie konopu keru panjiku mumindili kolongi liemo aku siku konopuni pilimele mele ‘Tepo kondokomolo. Olio pilipe konginjeli pelemo.’ ningu enono kapi ningu imbi liku ola naa munduku, aku siku kolo toko ungu sikema toko manie naa mundeyo. ¹⁵ Aku sipe pilipe konginjelimu mulu koleana wendo naa olemo;

† **3:12:** Mateyu 7:16-20, Ou-Korini 5:6, Gallesia 5:9, Ipuru 12:15, Pe-Pita 2:13, Jutu 12.

ya ma koleana wendo olemo. We-konopu-
 oumenga§ 1Pulu Yemonga, Minimu naa molo-
 rumume perimu kanu konopumenga wendo
 olemo; aku sipe ulu wendo olemomanga la-
 pamo depelemo yu.* 16 1Aku ungu nikirumunge
 pulumu isipe:, Yembo mare imbi ola molemo
 molo teko kondolemele molo ulu telemele mele
 kanokolie ‘Aku siku naa molangi. Aku siku
 naa teangi. Olio aku sipu molemelanje papu.’
 ningu eno-kinie konopu keru panjiku mumindili
 kolemele ulume telemele yemboma molemele
 kinie eno molemelena yemboma konopu telune
 pupili naa molko konopu lupe lupe pepili molko,
 marene ulu pulu keru lupe lupema telemele aku-
 munge 1kanu pilipe konginjelimu mulu koleana
 wendo naa olemo.’ nikiru,.

17 Nalo mulu koleana wendo olemo pilipe
 konginjeli akumu 1lupe, . Pulu Yemone pilipe
 konginjelimu yemboma silimo kinie kanu yem-
 bomane i siku telemele:
 Ulu kumbinemo ulu kake telime telemele.
 Ulu mare isipela: ‘Yemboma mindili naa siku
 eno-kinie konopu telune pupili taka liku molko,
 yemboma-kinie kara naa puku andiki teko
 taka liku molko,
 enonga nokoli yemane ungu nilimelema
 mimi siku pilku teko,
 yembo mare umbune pelemoma
 kondo kolko liku tapondoko,
 we yembo koropama molo kamakoma
 apurou naa apuruku

§ 3:15: bokumunge alsena anjokondo “29. olupela bel”. * 3:15:
 Setene kanumu; bokumunge alsena anjokondo “9. devil”.

yemboma kinie pali aku siku teko kondoko,
 kolo toko ‘Ulu peangama teamili.’ naa ningu,
 ‘Temolo.’ nilimele mele sike telemele.
¹⁸ ‘Yemboma konopu telune pupili.’ ningu
 ulume telemele yembomane poniena langi umbu
 mele
 mundulimele. Konopu telune pupili ulume
 poniena mundulimele kinie yemboma sumbi
 siku molko
 ulu peangama tenge ulume poniena wendo
 ombá.

4

4:1-10 Mana Ulu Konopu Mondolemele Yemboma Pulu Yemo Kinie Opa Pulue Molemele Ungu Te

¹ Eno irinele teko, opa teko, telemele akumu pulu nambolkarenga aku telemeleye? Enonga konopumenga melema kinie ulume kinie ‘Teamili.’ konopu lemele ulu akumene enonga konopune sukundu kerepale ningu opa mele telemomonga enone konopu talo yepoko pepili aku siku telemele. ² Melte kanokolie konopu mondoko ‘Liemili.’ konopu lemele nalo naa limele. Naa likulie yemboma toko kondolemele.* Yembo tenga melema kanoko yama melemele nalo aku melema linge aulke te naa lemomonga ,paa mumindili kolko, lakoko irinele teko opa telemele. Eno ‘Pulu Yemone melema sipili.’

* **4:2:** “yemboma toko kondolemele” nirimu akumu yembomane pilkulie Kirasinge yembomane aku naa telemelamonga ungu iko topa ‘konopu keru panjiku mumindili koringimunge nirimunje.’ ningu pilimele.

ningu yu-kinie ungu ningu melema mawa naa telemelemonga ‚Liemili.‘ nilimele melema, naa limele. ³ ‚Melema liemili.‘ ningu ‚Pulu Yemo, mawa telemele akume ‚Liemili.‘ nilimele mele enonga konopume Pulu Yemone kanopalie mawa telemele melema naa silimo. Eno enono ‚konopu sipu kapola molamili.‘ ningu mawa telemelemonga kanopalie naa silimo.

⁴ Ambo tene yunge yemo mundupe siye kolopa wapura andopa tolemo mele ‚eno pepá topo sikiru yemboma, Pulu Yemo munduku siye kolko melema konopu mondolemele yemboma, ma koleana ulume kinie melema ‚pulu lemo.‘ ningu tapu toko molemele yemboma aku siku molemelemonga Pulu Yemo kinie opa pulue mele molemele akumu eno naa pilimeleye? Ma koleana melema kinie ulume kinie konopu mondoko ‚olio-kinie pulu liepili tapu topo molamili.‘ nilimele yembomane aku siku nilimelemonga ‚Pulu Yemo kinie opa pulue molamili.‘ nilimele.†
⁵ Molo ‚Pulu Yemonga bokune molemo unguni we nilimo.‘ konopu lemeleye? Kanu unguni nimbendo:

“Olio yembomanga minime Pulu Yemone siri-
 mumene

‘Yunge ungume mindi pilku,
 yunge kongonoma manjiku teko molangi.
 Ungu te lupe pilku liku tenge kinie
 ‚olio minimene, paa kanopo keru kanopo
 konopu keru panjimolo.‘ nilimele.”

† 4:4: Galesia 6:14, Jono Kumbi Lepamo 2:15.

nimbe molemo[†] aku ungumu ‘We nilimo.’
konopu lekemeleye? ⁶ Nalo Pulu Yemone olio
we kondo kolopalie ‘lipe tapondolemo.’ Aku
sipe telemomonga ungu te Pulu Yemonga bokune
nimbe molemo. Akumu isipe:

‘Yembo te yunge imbimu yuyu lipe ola
mundulimomo

Pulu Yemone yunge imbimu

topa manie mundundupe

naa lipe tapondolemo.

Yembo te yuyu yunge imbimu

topa manie mundulimomo

Pulu Yemone we kondo kolopa lipe tapon-
dolemo.’

nimbe molemo kanumu.[§]

⁷ Akumunge Pulu Yemo liku awi siku yunge
ungume pilku molangi. Kondi tolemo depele-
mone* ungu nimbéma paa naa pilku tondolo
munduku liku bulu siengi. Aku tenge kinie eno
mundupe siye kolopa kowa pumbe.[†] ⁸ ‘Pulu
Yemo kinie tapu topo molamili.’ ningu yu
molemona nondoko wangi. Nondoko onge
kinie ‘Eno kinie tapu topo molamili.’ nimbe

[†] **4:5:** Pulu Yemone olio minime sirimu ungu te Ou Pulu Pulu 2:7
molemo nalo ya 4:5 monga pulumu mimi siku naa pilku kerepale
nilimele. Ya molemo mele ungu pulu te. Te isipela: “Pulu Yemone
olio sirimu minime ‘Keri lebanje.’ nimbe paa mimi sipe kanopa,
sike tepa kenjilimo kinie kanopalie konopu keru panjilimo.” aku
sipe mele. Te isipe: Yembo marene pilkulie, “‘mini’ nirimu
Pulu Yemone yunge Minimu yemboma silimo akumundu nirimu.’
ningu pilimele. **§ 4:6:** Ungu Tondolo Kangama 3:34, Mateyu

23:12*. *** 4:7:** Setene kanumu; bokumunge alsena anjokondo
“9. devil”. [†] **4:7:** Mateyu 4:11, Ou-Pita 5:5-9.

yu eno molongena nondopa ombá. Eno ulu pulu keru telemele yembomane ‚Pulu Yemo molemona nondopo pamili.‘ ningulie, yembo tenga ki kalaro molemo kinie kulumiye tolemo mele ‚enonga konopune enono pilimele ulume kulumiye tangi,‚. Eno yembo konopu talo pepa, ‚Pulu Yemo kinie ma koleana melema kinie konopu mondolemele, yembomane ‚Konopume kake tepili. We melema konopu kimbu sipu molemolo mele manie pupili.‘ niengi. ⁹ ‚Eno ulu telemelema, kanoko keru kanoko, konopu umbune tepa kamele mindili tepili kola awisili teko molangi. Tawe telemele ulumu munduku siye kolko yembo tenga pulu lemo yembo te kolemo kinie konopu keru panjipe kola telemo mele aku siku teangi. Paa konopu siku molemele ulumu munduku siye kolko konopu paa umbune pepili molangi. ¹⁰ Awilimunge† kumbikerena ‚Yu ye awilimu. Olionga imbime manie molopili.‘ ningu taka liku molangi. Aku tenga kinie yuni enonga imbime lipe ola mundundumbe.‡

4:11-12 Anjo Yando Yembomanga Ungu Bulkundu Naa Nindemili Ungu Te

¹¹ Angokeme, anjo yando enonga angenali marenga ungu bulkundu naa nindengi. Yembo tene yunge angenu tenga ungu bulkundu nindipe, “Tepa kenjilimo yembo kerimu.” nilimo yembomone ‚Pulu Yemonga, ungu manemanga kepe ungu bulkundu nindipe, ‚Mele kerimu.‘

† **4:10:** 15 bokumunge alsena anjokondo “6. Bikipela”. § **4:10:** Mateyu 23:12.

nilimo. Ungu manema* apurupe ‘mele kerimu’ nilimo yembomo ungu manema pilipe lipe naa tepa, ungu manemanga pilipe apuroli yembomo mele molemo. ¹² Ye telu mindi ungu manema sipe panjipe, ulume pilipe apuroli yemo molemo, akumu Pulu Yemo, . Kanu yemo yembo mindili nolemela aulkena pulimele yembo mare lipe tapondopa wendo lipe, yembo mare ‘Mindili nangi.’ nimbe topa manie mundulimo yemola.† Pe nu nambe-elenomone nunge pulu lemo yembo tenga ulume pilku apuruku ‘Tepa kenjilimo.’ nilinoye?‡

4:13-17 Opali Talou ‘I Sipu I Sipu Paa Temolo.’ Ningu Tondolo Munduku Ningu Naa Panjengi Ungu Te

¹³ Kinié nane ungu te nimbo tekeromo, piliee. Yembo marene ningendo: “Kinié molo opali kolea awili tenga pupu bisinete te-pumolo. Akune pupu ponie telu bisinete tepo kou mone awisili limolo.” nilimele yemboma piliee. ¹⁴ Opali ulu te wendo ombá kinie molonge mele eno naa pilimele kanumu. Enonga konde mololi ulu akumu lamana tepe kalemele kinie walsikele ilie wendo omba nondopa pora nilimo mele. ¹⁵ Akumunge aku siku naa ningu, i siku niengi: “Awilimuni ‘Na aku siku teani.’ nimu liemo kolou naa kolopo konde molopolie i ‘Teambo.’ nikiru mele sike tembo.”§ niengi. ¹⁶ Nalo enone aku siku naa nilimele. Eno kara puku enono

* **4:11:** bokumunge alsena anjokondo “26. lo”. † **4:12:** Mateyu 25:31-46. ‡ **4:12:** Mateyu 7:1-2. § **4:15:** LLuku 12:13-21.

kapi ningu imbi liku ola munduku “Kongono awili te temolo.” ningu yemboma ningu silimele. Aku siku ningu kapi nilimele ulumu paa ulu kerimu. ¹⁷ Akumunge yembo tene ulu peanga te konopuni pilipe ‘Aku sipu tembo kinie papu.’ nimbe pilipelie pe naa temu liemo aku sipe telemo ulumu ulu pulu keru te telemo.

5

5:1-6 Mele Awisili Nosilimele Yemboma Mele Kaloli Kerimu Linge Mele Liepi-Liepi Topa Nirimu Ungu Te

¹ Eno mele awisili nosilimele yemboma, enondo nimbo tekero ungumu pilieyo. Eno molongena umbune awili mare wendo ombá kene tondolo ru ningu kola teayo! ² Enonga mele awisili nosilimelema purupe lkupendi topa, enonga mulu-wambale mele peangama lkurini-ane nomba, ³ enonga kou golloma kinie kou sillipama kinie urelo tolemo. Koume urelo tolemomonga enone teko kenjilimele mele mona lepa, koume urelo tolemomone enonga kangine tepe mele nombá. Mulu ma nondopa pora nimbé tepili eno aku siku mele kande-kandema sukundu sukundu liku we nosilimele* kene ,tondolo ru ningu kola teayo,.

⁴ Mimi siku piliee. Enonga rasi witime inie tondoringi kongono kendemande yema kolo toko melema mimi siku naa kaloring-imene tondolo munduku ningendo: “Olio teko kenjikimili.” ningu walsilimele. Enone aku

* 5:3: Mateyu 6:19-20.

siku walseringi mele Awili Paa Tondolo Olan-
dopa Pelimuni yunge komuni pilipelie ,enone
kendemande yema teko kenjeringimunge eno
pundu tomba,.⁵ Ya ma koleana molkolie mele
lupe lupe peangama konopu mondoko ‘Liemili.’
ningu topo toko liku nosiku konopu siku molko,
molko kondoringi. ,Kongi toko nongendo ‘Kongi
akopili.’ ningu langi awisili nopili silimele mele,
eno langi paa awisili nongo yembo kapoma
molemele nalo kinié toko kondonge walemo
wendo okomo.†⁶ Yembo mare eno-kinie karaye
teko ulu keru te naa teko yembo sumbi nilime
moloringi yemboma kote tendeko toko kon-
doringi. Kanu yemboma tongendo amboloringi
kinie ‘Naa tangi.’ ningu karaye naa teko we
moloringi.

*5:7-20 ‘AWILIMU KELEPA OMBÁ.’ NINGU
ISILI-OU TONDOLO MUNDUKU MOLKO, PULU
YEMO KINIE UNGU NINGU, ‘YUNI LIPE TAPON-
DOPILI.’ NINGU MAWA TEKÓ MOLANGI UNGU
TE*

*5:7-11 Eno Molongena Umbunema Wendo Omb
Kinie ‘Awilimu Sike Kelepa Ombá’ Ningu Konopu
Tondolo Pupili Siye Naa Kolko Molangi Ungu Te*

⁷⁻⁸ Akumunge, angokeme, ,yembomane eno
umbunema silimele kinie, Awilimu‡ ou naa opili
we umbunema meaa. Yembo ponie telemele-
mane ‘enonga poniena langi peanga te wendo
ombá, lipu nomolo.’ ningu nokolemele. ,Langi
umbu mundukulie, ‘Lo omba ena tepa temba

† 5:5: Pulu Yemonga kote walemo wendo omb mondo nirimu.

‡ 5:7-8: bokumunge alsena anjokondo “6. Bikpela”.

kinie langi ola omba nou lemba.’ ningu taka liku nokoko molemele mele eno pilimele. Eno kepe, ponie telemo yembomone langi umbu panjipelie ‘Langi wendo omba nou lemba kinie nombó.’ nimbe taka lipe nokolemo mele aku siku enonga konopu tondolo pupili umbunema we mengo taka liku molangi. ‘Awilimu yando ombá walemo paa nondopa ombá tekemo kene’ 1 ningu, aku siku molangi.

⁹ Angokeme, anjo yando “1Pulu Yemonga, yembomane ulu telemelemonga umbunema wendo wendo olemo.” ningu iri toko ungu bulkundu nindiku naa teangi. ‘1Pulu Yemonga, kotena naa angiliemili.’ ningu aku siku naa teangi. Kote Pilimbe Yemo nondopa okomo.

¹⁰ Angokeme, Awilimuni ungu umbu tondorumume pilku yemboma ningu siringi yemane§ Awilimunge ungu ningu siringimunge 1opa puluemané, eno teko kenjeringi kinie tondolo munduku umbunema taka liku meringi mele pilkulie aku siku manda manjiku teangi.

¹¹ Eno pilimele. ‘Yembo konopu tondolo pupili umbunema we mengo 1‘Sike.’ ningu tondolo munduku pilimele mele, munduku siye naa kolemele yemboma eno malo.’ nimbu pilimolo kanumu. 1Ou molorumu, ye Jopo tondolo mundupe, yu-kinie umbune wendo orumume we memba molorumu kinie pe Awilimuni ‘Yu kelepa molopa kondopili.’ nimbe ulu mare terimu mele temanemo* eno pilimelela. Olio pil-

§ 5:10: bokumunge alsena anjokondo “35. profet”. * 5:11: Joponga temanemo boku Jopo akune sukundu molemo.

imolo, Awilimuni yemboma paa kondo kolopa, ulu telemelemanga pundu topa mindili silke nalo we mundupe siye kolemo kanumu.

5:12 “Ulu Te Temolo.” Ningulie “Paa Sike Nikimulu.” Ningu Pulu Yemonga Imbi Leko Mi Naa Leangi Ungu Te

¹² Nanga angokeme, ulu te kumbi leko tenge mele isipe: Mulu koleana molo ma koleana molo meltenga imbi leko “Paa sike nikiru,” ningu mi naa leangi. Ulu te “Temolo.” ningi liemo paa sike teangi. Ulu te “Naa temolo.” ningi liemo paa sike naa teangi. Kolo toko “E.” ningu ulu te naa tenge molo kolo toko “Molo.” ningulie ulu te tenge kinie, 1Pulu Yemonga kotena angilinge kinie, ‘Teko kenjeringi kene mindili nangi.’ nimbé.†

5:13-18 Yembo Te Konopu Sumbi Nipili Molemomone

¹³ Enonga yembo te umbune melemoye? Umbune te melemo liemo 1Pulu Yemo, mawa tepili. Enonga yembo te konopu silimoye? Konopu silimo liemo yu konana nimbe 1Pulu Yemo, kapi nimbe imbi lipe ola mundundopili. ¹⁴ Enonga yembo te kuru tolemoye? Kuru tolemo liemo Kirasinge talapena‡ molemele tapu yema§ wal-sipelie ‘Enone yunge ningu 1Pulu Yemo kinie, ungu ningu 1‘Yu altopa kapola molopili.’ nip-ili.’ ningu, mawa tendekolie Awilimunge im-bimu walsiku* yunge kangine kopongo wele

† **5:12:** Mateyu 5:34-37, 23:16-22, Pe-Korini 1:17-20, Wendo Oringi 20:7. ‡ **5:14:** bokumunge alsena anjokondo “43. sios”.

§ **5:14:** bokumunge alsena anjokondo “16. hetman”. * **5:14:** bokumunge alsena anjokondo “28. nem”.

kandondangi wangi.’ nimbe walsepili. ¹⁵ Kanu kinie walsimbe yema ongolie ‘Pulu Yemone sike temba.’ ningu tondolo munduku pilkulie† yu mawa tenge kinie Awilimuni ‘Yunge kurumu pora nipili.’ nimbé kinie yu kelepa kapola molomba. Aku yembomo ulu keru mare temu liemo Awilimuni ‘Manie pupili.’ nimbe siye kolombala. ¹⁶ Akumunge enonga kuru tolemoma ‘pora nipili, konde pamili.’ ningulie eno yu-mele-mele enonga ulu pulu keru telemelema yembomando ningu para siengi, enone enonga ningu ıPulu Yemo, mawa tendangi. Aku tenge kinie ıPulu Yemone, ‘Eno altoko manda molangi.’ nimbé. Yembo konopu sumbi nimbe pelimuni yembo tenga ıPulu Yemo, mawa tendelema kinie yuni mawa tendelema mele paa tondolo enge nimbe yembomo paa manda lipe tapondolemo. ıAkumunge aku siku Pulu Yemo yembomanga ningu mawa tendenge kinie pilipelie aku sipe tendemba.ı

¹⁷ ıAku nikirumunge temane te tambo:ı, ıPulu Yemone ungu umbu tondorumume pilipe yando nimbe sirimu ye, Illainja yu olio mele ye te molorumu. Nalo yuni ıPulu Yemo kinie, tondolo mundupe mawa tepa “‘Lo naa opili.’ ni.” nirimu kinie ponie yepoko oli talo pakera lo naa orumu. ¹⁸ Altopa ı“Lo opili.” nimbe, mawa terimu kinie lo kelepa omba poniena langime altopa wendo orumu.‡ ıKinié kepe Pulu Yemo aku sipe yembo-mane mawa tenge mele pilipelie temba.ı ‘Mawa

† 5:15: bokumunge alsena anjokondo “8. bilip”. ‡ 5:18: Ou-Kingime 17:1,7, 18:1-2,41-45, LLuku 4:25.

Tembo Mele Awilimuni Sike Pilipelie Temba.
 Nimbe Tondolo Mundupe Pilipelie Pulu Yemo
 Kinie Mawa Temba Mele Pulu Yemone Sike Pilipe
 Temba Ungu Te

*5:19-20 Yembo Te Ungu Sikemo Mundupe Siye
 Kolomba Kinie Yu Kelko Yando Linge Ungu Te*

¹⁹ Nanga angokeme, enonga yembo tene ,Pulu
 Yemonga, ungu sikemo mundupe siye kolopa
 ulsu pumbe kinie enonga yembo tene yu kelepa
 yando limu liemo ²⁰ ,tepa peanga temba mele,
 i siku piliengi: Yembo tene ulu pulu keru teli
 yembomo tepa kenjilimo aulkena pumbe kinie
 ,kanopalie, ‘Pulu Yemonga ungumu pilipe yunge
 talapena omba molopili.’ nimbe lipe tapondopa
 yando limbemonga ulu pulu keru teli yembo
 mini pali kolka aulkena kelepa limbe. Aku sipe
 tembamonga ,Pulu Yemone, ulu pulu keru awisili
 mundupe siye kolondomba akumu mimi siku
 piliengi!

,Aku pea nikiru.,

PULU YEMONGA UNGU KONDEMO
The New Testament in the Kala Dialect of the
Umbu-Ungu Language of Papua New Guinea
Nupela Testamen long tokples Umbu-Ungu Kala

copyright © 1995 Wycliffe Bible Translators, Inc.

Language: Umbu-Ungu Kala (Umbu-Ungu)

Dialect: Kala

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-04

PDF generated using Haiola and XeLaTeX on 11 Nov 2022 from source files dated 22 Nov 2019

3bcf1cc7-ff71-5f43-8a87-20ca98e9c4a7